

四庫全書

史部

欽定四庫全書

史部  
元史卷一百九十四至  
八

檢討臣翁樹培覆勘

總校官編修臣朱鈴

欽定四庫全書

元史卷一百九十四

翰林學士亞大夫知制誥兼修國史宋濂等修

列傳八十一

忠義二

張桓字彥威真定廣城人父朱

知汝寧府因家焉桓以

國子生釋褐授滑之白馬丞入補中書掾擢國子典簿

拜陝西行臺監察御史以言事不合去未幾汝寧盜起

桓避之確山賊久知桓名襲獲之羅拜請為帥弗聽因  
六日擁至渠魁前桓直趨據榻坐與之抗論逆順其徒  
摔桓起跪桓仰天大呼詈叱彌厲且屢唾賊面賊猶不  
忍殺謂桓曰汝但一揖亦恕汝死桓瞋目曰吾恨不能  
手斬逆首肯聽汝誘脅而折腰哉賊知終不可屈遂刺  
之年四十八賊後語人曰張御史真鐵漢害之可惜事  
聞贈禮部尚書諡忠潔

李黼字子威潁人也工部尚書守中之子守中性卞急

遇諸子極嚴每一飲酒輒半月醉不解黼百計承順求  
寧親心終不可得跪而自訟往往達旦無幾微厭怠之  
意初補國子生泰定四年遂以明經魁多士授翰林修  
撰明年代嗣西嶽省臣謂黼曰敕使每後我今可易邪  
黼曰王人雖微春秋序於諸侯之上尊君也奈何後乎  
省臣不敢對改河南行省檢校官遷禮部主事拜監察  
御史首言禴祠烝嘗古今大祭今太廟唯二祭而日享  
佛祠神御非禮也宜據經行之成均教化之基不當隸

集賢宜屬省臣兼領諸侯王歲賜有定額分封易代之際陳請恩例世系戚疏無成書可攷宜倣先代修正玉牒皆不報轉江西行省郎中入為國子監丞遷宣文閣監書博士兼經筵官數與勸講每以聖賢心法為帝言之俄中書命黼巡視河渠黼上言曰蔡河源出京西宋以轉輸之故平地作堤今河底填淤高出地面秋霖一至橫潰為災宜按故迹修浚他日東河或有不測之阻江淮運物當由此分道達京萬世之利也亦不報陞祕

書太監拜禮部侍郎奉旨詳定中外所上封事已而廷議內外官通調授黼江州路總管至正十一年夏五月盜起河南北據徐蔡南陷蘄黃焚掠數千里造船北岸銳意南攻九江居下流實江東西襟喉之地黼治城壕修器械募丁壯分守要害且上攻守之策於江西行省請兵屯江北以扼賊衝庶幾大江之險賊不得共之不報黼嘆曰吾不知死所矣乃獨椎牛饗士激忠義以作士氣數日之間紀綱粗立十二年正月己未賊渡江陷

武昌威順王及省臣相繼遁舳艫蔽江而下江西大震賊乘勝破瑞昌右丞博囉特穆爾方軍于江聞之遁黼雖孤立辭氣愈奮厲時黃梅縣主簿伊遜特穆爾願出擊賊黼大喜向天瀝酒與之誓言始脫口賊游兵已至境急檄諸鄉落聚木石於險塞處遏賊歸路倉卒無號乃墨士卒面統之出戰黼身先士卒大呼陷陣伊遜特穆爾繼進賊大敗逐北六十里鄉丁依險阻乘高下木石橫屍蔽路殺獲二萬餘黼還謂左右曰賊不利於陸



必由水道以舟薄我苟失備禦吾屬無噍類矣乃以長  
木數千冒鐵椎於杪暗植沿岸水中逆刺賊舟謂之七  
星樁會西南風急賊舟數千果揚帆順流鼓譟而至舟  
遇樁不得動進退無措黼帥將士奮擊發火翎箭射之  
焚溺死者無算餘舟散走行省上黼功請拜江西行省  
叅政行江州南康等路軍民都總管便宜行事已而賊  
勢更熾西自荆湖東際淮甸守臣往往棄城遁黼守孤  
城提孱旅斬馘扶傷無日不戰中外援絕二月甲申賊

將薄城分省平章政事圖沁布哈自北門遁黼引兵登  
陴布戰具賊已至甘棠湖焚西門乃張弩箭射之賊趨  
趨未敢進轉攻東門黼救東門賊已入與之巷戰知力  
不敵揮劍叱賊曰殺我毋殺百姓賊自巷背來刺黼墮  
馬黼與從子秉昭俱罵賊而死郡民聞黼死哭聲震天  
相率具棺葬于東門外黼死踰月叅政之命始下年五  
十五黼兄冕居穎亦死于賊秉昭冕季子也事聞贈黼  
攄忠秉義效節功臣資德大夫淮西江北等處行中書

省左丞上護軍追封隴西郡公諡忠文詔立廟江州賜  
額曰崇烈官其子秉方集賢待制

李齊字公平廣平人家甚貧客於江南工辭章元統元  
年進士第一歷僉河南淮西廉訪司事移知高郵府有  
政聲至正十年盜突八府驛取十二馬去齊躬追謝長  
等殺之十一年州人秦觀保造兵仗將圖劫掠復獲而  
行誅十三年泰州白駒場亭民張士誠為亂破泰州淮  
南行省遣齊往招降被拘久之賊酋自相殺始縱齊來

歸泰州平賊徒尚蠡聚士誠復鼓變殺叅知政事趙璉  
掠官庫民財走入得勝湖俄陷興化縣行省以左丞僕  
誓篤偕宗王鎮高郵使齊出守覺社湖夏五月乙未數  
賊入城一譟呼而省憲官皆遁齊急還救城賊已閉門  
拒我遂連興化接得勝湖舟艦四塞蔓延入寶應縣已  
而有詔凡叛逆者赦之詔至高郵不得入賊紿曰請李  
知府來乃受命行省強齊往至則下齊獄中齊益辯說  
士誠本無降意特遷延為繕飭計耳官軍謀知之乃進

攻城士誠呼齊使跪齊叱曰吾膝如鐵豈肯為賊屈士  
誠怒扼之跪齊立而詬之乃曳倒槌碎其膝而高之論  
者謂大科三魁若台哈布哈沒海上李黼隕九江洎齊之  
死皆不負所學云

褚不華字君實隰州石樓人沉默有器局泰定初補中  
瑞司譯史授海道副千戶轉嘉興路治中連拜南臺西  
臺監察御史遷河西道廉訪僉事移淮東未幾陞副使  
汝穎盜發勢張甚不華行郡至淮安極力為守禦計賊

至多所斬獲且請知樞密院婁章判官劉甲守韓信城  
相犄角為聲援復上章劾總兵及諸將逗撓之罪朝廷  
錄其功陞廉訪使階中奉大夫甲有智勇與賊戰輒勝  
賊憚之號曰劉鐵頭不華頗賴之總兵者聞不華劾已  
益恚嫉乃檄甲別將兵擊賊冀以困不華甲去韓信城  
陷賊乃掘塹相銜捷水寨以圍我既而天長青軍叛布  
延持穆爾所統黃軍復叛賊皆挾之來攻不華知事危  
退入哈喇章營賊稍引去乃出抵楊村橋賊奄至殺廉

訪副使布達實哩啖其屍不華以餘兵入淮安時城之  
東西南三面皆賊惟北門通沭陽阻赤鯉湖指揮使魏  
岳楊暹駐兵沭陽淮安倚其芻餉而赤鯉湖為賊據沭  
陽路又絕賊計孤城可取進柵南鎖橋不華與元帥張  
存義出大西門會僉事呼圖克布哈兵突賊柵殊死戰  
賊敗走追北二十餘里城中食且絕元帥吳德琇運糧  
萬斛入河竟為賊所掠德琇僅以身免賊與青軍攻圍  
日益急總兵者屯下邳相去五百里按兵不出凡遣使

十九輩告急皆不聽城中餓者仆道上即取啖之一切  
草木螺蛤魚蛙燕鳥及韉皮鞍韉草箱敗弓之筋皆盡  
而後父子夫婦老穉更相食撤屋為薪人多露處坊陌  
生荆棘力既盡城陷不華猶據西門力鬪中傷見執為  
賊所嚮次子班格冒刃護之亦見殺時至正十六年十  
月乙丑也不華守淮安五年殆數十百戰精忠大節人  
比之張巡云朝廷聞之贈翰林學士承旨榮祿大夫柱  
國追封衛國公諡曰忠肅賻鈔二百錠以卹其家



郭嘉字元禮濮陽人祖昂父惠俱以戰功顯嘉慷慨有大志始由國子生登泰定三年進士第授彰德路林州判官累遷翰林國史院編修官除廣東道宣慰使司都元帥府經歷未幾入為京畿漕運使司副使尋拜監察御史會朝廷以海寇起欲於浙東溫台慶元等路立水軍萬戶鎮之衆論紛紜莫定擢嘉禮部員外郎乘驛至慶元與江浙行省會議可否嘉至首詢父老知其弗便請罷之會方擇守令綏靖遼東乃授嘉廣寧路總管兼

諸鄂囉勸農防禦屬盜起軍旅數興供餉無虛日民苦和糴轉輸而吏胥得因時為奸嘉設法計其戶口第其甲乙民甚便之有詔團結義兵嘉招集民數千教以生作進退萬千百夫各統以長號令齊一賞罰明信故東方諸郡錢糧之富甲兵之精稱嘉為最至正十八年寇陷上京嘉聞之率兵出禦既而遼陽陷嘉將衆巡邏去城十五里遇青號隊伍百餘人紿言官軍嘉疑其詐俄果脫青衣變紅嘉出馬射賊分兵兩隊而夾攻之生擒

賊數百死者無筭嘉見賊勢日熾孤城無援乃集同官  
議攻守之計衆皆失措嘉曰吾計決矣因竭家所有衣  
服財物犒義士以勵其勇敢且曰自我祖宗有勲王室  
今之盡忠吾分內事也況身守此土當生死以之餘不  
足恤矣頃之賊至圍城亘數十里有大呼者曰遼陽我  
得矣何不出降嘉挽弓射呼者中其左頰墮馬死賊稍  
引退嘉遂開西門逐之賊大至力戰以死事聞贈崇化  
宣力效忠功臣資善大夫河南江北等處行省左丞上

護軍封太原郡公諡忠烈

喜同周姓河西人初為後宮衛士衆稱其才選充承徽寺經歷再調南陽縣達嚕噶齊居二歲妖賊起陷鄧州人情洶洶俄而賊鋒抵南陽南陽無城無兵賊入之若虛邑喜同以計獲數賊詰之云賊將大至悉斬之以安衆心晝夜督丁壯巡邏守備時大司農錢穆爾以兵駐于諸葛菴為賊所襲死之賊遂乘銳取南陽喜同守西門望見賊勢盛即以死自許與家人訣曰吾與汝等不

能相顧矣但各逃生吾分死此以報國也已而城中皆  
哭喜同策厲義兵奮力與賊搏賊退去明日復至與戰  
甚力殺賊凡數百賊知無後援戰愈急南陽遂陷喜同  
突圍將自拔賊橫刺其馬馬蹶喜同鞭馬躍而起手斬  
刺馬者俄而為他賊所追身被數鎗不能關遂見執為  
所殺妻邢氏聞喜同力戰死率家僮數人出走遇賊奪  
賊刀斫之且罵且前亦見殺一家死者二十餘人贈南  
陽路判官時襄陽錄事司達嚕噶齊塔布台字彥暉者

元統元年進士魏王軍汝亳塔布台來供餉王嗜酒輕  
戰備一夕賊刼王王卧未能起為所執塔布台馳騎奪  
王亦為賊所得比明見賊酋王拜乞活塔布台以足蹴  
王曰猶欲生乎賊復屈其拜塔布台拒而詬之且與縛  
者角遂支解

韓因字可宗汴梁人少習舉子業負氣不羣盜據汝寧  
官軍討之久不下會朝廷詔赦叛逆募可持詔入賊者  
即借以官因應命乃借因以唐州判官使焉賊渠恐其

黨心搖導因止于外納詔不讀詰問再三因荅以恩宥  
寬大禍福所係甚切不聽乃縱因歸報因出乘馬周賊  
叱大言曰汝輩好百姓何不降歸田里而甘從逆賊驅  
使耶衆愕眙相顧或以告賊渠渠追因責其所言因極  
口肆詈賊怒寸割因

卞琛大名人世為農夫早游學京師得補國子生既而  
丁母憂治農于家至正十二年鄰郡盜起未幾來剽掠  
琛與從子小十府史李仲亨等協謀統丁壯數百人擊

賊丁壯皆民兵無弓矢之備直以鉤鉏白梃當賊賊矢  
雨集琛衆潰散被擒仲亨小十皆死賊素知琛諭之曰  
汝從我解汝縛不從殺汝琛唾罵曰我國子生也視汝  
逆賊真狗彘也吾寧義死不從賊生罵不止賊屢脅不  
聽殺之

喬彛字仲常晉寧人性高介有守一時名稱籍甚至正  
十八年賊由絳州垣曲縣襲晉寧城陷城中死者十二  
三彛整冠衣聚妻子家有大井彛坐井上令妻子婢輩



循次投井中而已隨赴之彞既死賊首王士誠使人即  
彞家邀致之至則彞已死矣賊平朝廷贈彞臨汾縣尹  
賜諡純潔有張嵩起王佐者皆士人也並以不屈賊而  
死嵩起字傳霖汾州人累舉不中嘗用薦者徵為國子  
助教居一歲免歸盜既去晉寧復陷汾州嵩起與妻赴  
井死王佐字元輔晉寧人從父居上都教授里巷不與  
時俯仰會賊至倉卒不能避為所獲欲降之佐傲岸自  
如詬賊不輟因見害又有吳德新者字止善建昌人工

醫留京師久之常往寧夏會盜至德新見執脅使降德  
新厲聲曰我生為皇元人死作皇元鬼誓不從爾賊賊  
乃縛其兩手加白刃頸上迫其畏屈德新罵不已乃曳  
之井上陽欲擠之德新偶得寬即自投井中仰罵賊賊  
下射矢貫其頂罵益力賊怒以長鎗刺之然亦壯其志  
憐其死曰此真丈夫也以土埋井而去

顏瑜字德潤兗州曲阜人充國復聖公五十七代孫也  
以行誼用舉者為鄒及陽曲兩縣教諭至正十八年田

豐起山東瑜携家走鄆城道遇賊以刃來脅瑜曰爾何人瑜曰我東魯書生也賊執瑜曰爾書生吾不爾殺可從我見主帥瑜罵曰爾賊何主帥邪賊怒欲殺瑜瑜無懼色復使之寫旗瑜大詬曰爾大元百姓天下亂募爾為兵而反為叛逆我腕可斷豈能為爾寫旗從逆乎賊以鎗刺瑜至死罵不絕口其妻子皆為所害又有曹彥可者亳州人會妖寇起里中多田野無賴子目不知書者既破毫揭帛于竿皆羣趨彥可家劫之使寫旗彥可

力辭乃迫以刀斧彥可唾之曰我儒者知有君父寧死耳豈為汝寫旗者耶賊怒遂見害年七十矣其家素貧又死於亂橐殞其尸賊既定有司具以事聞中書為給貲以葬賜諡節愍

王士元字堯佐恩州人泰定四年進士由棣州判官累遷知磁州值軍興餽餉需索日繁民不堪命士元心念其民力為區畫至為將士陵辱訶責弗避也改知濬州州濱黃河嘗經盜賊城堞不完市井空荒士元邑邑不

得志而臨事未嘗易其素至正十七年賊復迫濬州  
兵悉潰散士元坐堂上顧其子致微使避賊曰吾守臣  
居此職也若可逃生子侍立不忍去賊前問曰爾為誰  
士元叱曰我王知州也強賊識我否賊欲縛士元士元  
奮拳毆賊賊怒并其子殺之

楊樸字文素河南人早以文學得推擇為吏仕至滁州  
全椒縣尹滁界廬江廬江陷於寇滁人震動行省叅政  
額森總兵于滁不理軍事唯縱飲至暮城門不鑰寇入

縱火猶張燭揮杯急踰城出走樸度必死乃盡殺其妻  
女朝服坐堂上盜欲降之樸指妻女示曰我已戕我屬  
政欲死官守耳尚何云云乃連唾之賊繫樸倒懸樹上  
而割其肉至盡猶大罵弗絕

趙璉字伯罷宏偉之孫也至治元年登進士第授嵩州  
判官再調汴梁路祥符縣尹入為國子助教累遷湖廣  
行省左右司郎中除杭州路總管杭於東南為劇郡地  
大民夥長吏多不稱其職璉為人強毅開敏精力絕人

吏莫不服其明決而不敢欺浙右病於徭役民充坊里  
正者皆破其家朝廷令行省召入郡守集議便民之法  
璉獻議以屬縣坊正為雇役里正用田賦以均之民咸  
以為便有盜誘其同惡持刃出市斫人以索金市民乃  
戶歛以予之人無敢言者璉曰此不可長也遣卒掩捕  
之盡戮諸市踰年召拜吏部侍郎杭人思之刻其政績  
于碑歷中書左司郎中除禮部尚書尋遷戶部拜參議  
中書省事出為山北遼東道廉訪使是時河南兵起湖

廣荆襄皆陷而兩淮亦騷動朝廷乃析河南地立淮南江北行省于揚州以璉參知政事璉方病水腫即與疾而行既至分省鎮淮安又移鎮真州會張士誠為亂突起海濱陷泰州興化行省遣兵討之不克乃命高郵知府李齊往招諭之士誠因請降行省授以民職且乞從征討以自効遂移璉鎮泰州璉乃趣士誠治戈船趨濠泗士誠疑憚不肯發又覘知璉無備遂復反夜四鼓縱火登城璉力疾捫佩刀上馬與賊鬪市衢賊圍璉邀至



其船璉詰之曰汝輩罪在不赦今既宥爾誅戮又錫以名爵朝廷何負於汝乃既降復反邪汝棄信逆天滅不旋踵我執政大臣豈為汝賊輩屈乎即馳騎奮擊賊賊以槩撞璉墜地欲舁登其舟璉瞋目大罵遂死之其僕楊兒以身蔽璉亦俱死及亂定州民收其屍歸殯于真州事聞賻鈔三百錠謚曰忠定仍官其子錡弟琬字仲德仕至台州路總管至正二十七年方國瑛以舟挾琬潛登白龍輿舍於民家絕粒不食人勸之食輒瞑目卻

之七日而死

孫撫字自謙曹州人至正二年進士授濟寧路錄事張士誠據高郵叛或謂其有降意朝廷擇烏瑪喇為使招諭士誠而用撫為輔行撫家居不知也中書借撫集賢待制給驛就其家起之撫强行抵高郵士誠不迓詔使撫等既入城反覆開諭士誠等皆竦然以聽已而拘之他室或日一饋食或間日一饋食欲以降撫撫唯詬斥而已乃令其黨捶撫肆其陵辱撫不卹也及士誠狃平

江撫與士誠部將張茂先謀將撫所授站馬劄子遣壯士浦四許誠赴鎮南王府約日進兵復高郵謀泄執撫訊問撫罵聲不絕竟為所害後賊中見失節者輒自相咄曰此豈孫待制耶事聞贈翰林侍讀學士中奉大夫護軍追封曹南郡公諡忠烈賜田三頃恤其家

石普字元周徐州人至正五年進士授國史院編修官改經正監經歷淮東西盜起朝廷方用兵普以將略稱同僉樞密院事董鑰薦其材會丞相托克托討徐州以

普從行徐平錄功遷兵部主事尋陞樞密院都事從樞密院官守淮安時張士誠據高郵普詣丞相面陳破賊之策且曰高郵負重湖之險地皆沮洳騎兵卒莫能前與普步兵三萬保取之高郵既平則濠泗易破普請先驅為天下忠義倡丞相壯之命權山東義兵萬戶府事招民義萬人以行而汝中栢者方用事陰沮之減其軍半初令普便宜行事及行又使聽淮南行省節制普行次范水砦日未夕普令軍中具食夜漏三刻下令銜枚

趨寶應其營中更鼓如平時抵縣即登城樹幟城上賊大驚潰因撫安其民由是諸將疾普功水陸進兵乘勝拔十餘砦斬賊數百將抵高郵城分兵三隊一趨城東備水戰一為奇兵虞後一普自將攻北門遇賊與戰賊不能支遁入城普先士卒躡之縱火燒關門賊懼謀棄城走而援軍望之按不進且忌普成功總兵者遣蒙古軍千騎突出普軍前欲收先入之功而賊以死扞蒙古軍恇怯即馳回普止之不可遂為賊所蹂踐率墜水中

普軍亂賊乘之普勒餘兵血戰良久仗劍大呼曰大丈夫當為國死有不進前者斬奮擊直入賊陣中從者僅三十人至日西援絕被創墮馬復步戰數合賊益至賊指曰此必頭目不可使逸湏生致之普叱曰死賊奴我即石都事何云頭目左脅為賊鎗所中猶手握其鎗斫賊死賊衆攢鎗以刺普普與從者皆力戰俱死之

盛昭字克明歸德人由儒學官累遷淮南行省照磨會詔使往高郵不得達而還謬稱賊已迎拜但乞名爵耳

行省不虞其欺乃遣昭入高郵授所與士誠官士誠拒  
不聽拘諸舟中昭語所從吏曰吾之止此有死而已既  
而官軍逼高郵士誠授昭以兵使出拒官軍昭叱曰吾  
奉命招諭汝汝拘留詔使罪不容斬又欲吾從汝為賊  
耶大罵不絕口賊怒先剗其臂肉而後磔之

楊乘字文載濱州渤海人至正初為介休縣尹民饑散  
為盜乘立法招之使自新皆棄兵頓首願為良民其後  
累官江浙行省左右司員外郎坐海寇掠漕糧舟免官

寓居松江張士誠入平江其徒郭良弼董綬言乘于士誠士誠遣張經招乘乘曰良弼綬皆名臣今已失節顧欲引我以濟其惡邪且讓經平日讀書云何經俛首不能對乘且與客痛飲竟日不言客問盍行乎乘曰乘以一小吏致身顯官有死而已尚何行之有經促其行愈急乘乃整衣冠自經死年六十四

尼雅斯拉鼎字士瞻父瑪哈穆特從征襄陽以勞擢瀋州達魯噶齊因家大名尼雅斯拉鼎舉鄉貢進士補淮



東廉訪司書吏丁母憂服闋補兩浙鹽運司掾復辟掾淮  
東宣慰司至正十年賊發真州尼雅斯拉鼎以民兵襲  
之獲賊四十二人已而泰州賊熾鎮南王府宣慰司請叅  
議軍事尼雅斯拉鼎建議築四城立外寨捷堤穿河募  
兵與賊抗行省檄其提戰艦六十海舟十四上下巡捕  
以固江面且護蒙古軍五百往江寧道遇賊斬擊二百  
餘級生獲十八人遂抵龍潭而還未幾出邏江上賊  
突至馳船來鬪尼雅斯拉鼎手射死三十賊奪其放火

小船二百賊遁走俄復據龍潭口又擊走之追斬三百餘級其子寶通擒首賊陳亞虎等及其號旗捷聞賞賚良渥且召尼雅斯拉鼎還真州而賊犯蕪湖南行臺檄使以兵赴援及至賊船已薄岸遂三分戰艦縱擊之賊奔潰俘斬甚衆賊不得渡江者多尼雅斯拉鼎之功也因留守蕪湖江口泰州李二起行省移之捍高郵得勝湖賊船七十餘舵乘風而來即前擊之焚其二十餘船賊潰去李二失援遂降其黨張士誠殺李二復為亂戕

叅政趙璉入據興化而水陸襲高郵屯兵東門尼雅  
斯拉鼎以舟師會諸軍討之距三絜鎮賊衆猝至尼  
雅斯拉鼎麾兵挫其鋒後賊鼓譟而前乃發火箭火鏃  
射之死者蔽流而下賊繚船於背盡力來攻而阿蘇衛  
軍及真滌萬戶府等官見賊勢熾皆遁走尼雅斯拉鼎  
顧必死謂其三子寶通海瑠丹錫卜沙魯曰汝輩可脫  
走寶通等不肯去遂皆死之省憲為賻其家事聞贈尼  
雅斯拉鼎淮西元帥府經歷

元史卷一百九十四

元史卷一百九十四考證

張桓傳賊知終不可屈遂刺之 按輟耕錄載賊縛桓

妻孥九人至先殺妾次殺子女以及妻每殺一人則  
謂桓曰御史若降餘可免桓弗為動乃至正辛丑八  
月事也傳未之詳今附識

趙璉傳謚曰忠定 原刻脫此句據洛陽志增



欽定四庫全書

元史卷一百九十五

明翰林學士亞中大夫知制誥兼修國史宋濂等修

列傳第八十二

忠義三

巴延布哈德濟字蒼崖輝和爾氏駙馬都尉中書丞相  
封高昌王舒蘇德濟之孫駙馬都尉江浙行省丞相封  
荆南王多喇德濟之子也侗儻好學曉音律初用父廕

同知信州路事又移建德路會徽寇犯遂安已延布哈德濟將義兵平之又擒淳安叛賊方清之以功陞本路總管至正十六年授衢州路達魯噶齊明年行樞密院判官鄂爾和引兵經衢州軍無紀律所過輒大剽掠已延布哈德濟曰鄂爾和以官軍而為民患此國賊也可縱之乎乃帥兵逐之出境郡賴以寧陞浙東都元帥守禦衢州頃之擢江東道廉訪副使階中大夫十八年二月江西陳友諒遣賊黨王奉國等號二十萬寇信州明



年正月已延布哈德濟自衢引兵援焉及至遇奉國城  
東力戰破走之時鎮南王子大勝努樞密院判官席閏  
等屯兵城中聞已延布哈德濟至爭開門出迎羅拜馬  
前已延布哈德濟登城四顧誓以破賊自許後數日賊  
復來攻城已延布哈德濟大饗士卒約曰今日破賊不  
用命者斬乃命大都閭將阿蘇諸軍及民義為左翼出  
南門高義范則忠將信陽軍為右翼出北門自與呼圖  
克布哈將沿海諸軍為中軍出西門部伍既整因奮擊

入賊營斬首數千級賊亂幾擒奉國適賊將突至我軍入其營者咸沒勢將殆呼圖克布哈復勒兵力戰大破之二月友諒弟友德營於城東繞城植柵攻我益急又遣偽萬戶周伯嘉來說降高義潛與之通紹呼圖克布哈等謂與奉國相見則兵可解呼圖克布哈信之率則忠等十人往見奉國因之不遣明日奉國令高義以計來誘已延布哈德濟時已延布哈德濟坐城上見高義單騎來已延布哈德濟謂曰汝誘十帥無一人還今復

來誘我耶我頭可斷足不可移乃數其罪斬之由是日  
夜與賊鏖戰糧竭矢盡而氣不少袁夏四月有大呼於  
城下者曰有詔參謀海瑠丹臨城問之曰何來曰江西  
來海瑠丹曰如此乃賊耳吾元朝臣子可受爾偽詔乎  
呼者曰我主聞信州久不下知爾忠義故來詔爾徒守  
空城欲何為耶海瑠丹曰汝聞張睢陽事乎偽使者不  
答而去已延布哈德濟笑曰賊欲我降爾城存與存城  
亡與亡吾計之熟矣時軍民唯食草苗茶紙既盡括靴

底煮食之又盡掘鼠羅雀及殺老弱以食五月大破賊兵六月奉國親來攻城晝夜不息者踰旬賊皆穴地百餘所或魚貫梯城而上巴延布哈德濟登城麾兵拒之已而士卒力疲不能戰萬戶奎瑪里以城叛城遂陷席閏出降大勝努海瑠丹皆死之巴延布哈德濟力戰不勝遂自刎其部將蔡誠盡殺妻子及蔣廣奮力巷戰誠遇害死廣為奉國所執愛廣勇敢使之降廣曰我寧為忠死不為降生汝等草中一盜爾吾豈屈汝乎賊怒磔

廣於竿廣大罵而絕有陳受者信小民也巴延布哈德  
濟知受有脅力募為義兵尋戰敗為賊擒痛罵不屈賊  
焚殺之先是巴延布哈德濟之援信州也嘗南望泣下  
曰我為天子司憲視彼城之危急忍坐視乎吾知上報  
天子下拯生民餘皆無可恤所念者太夫人耳即日入  
拜其母鮮于氏曰兒今不得事母矣母曰爾為忠臣吾  
即死復何憾鮮于氏太常典簿樞之女也巴延布哈德  
濟因命子額森布哈奉其母問道入福建以江東廩訪

司印送行御史臺遂力守孤城而死朝廷賜諡曰桓敏  
樊執敬字時中濟寧鄆城人性警敏好學由國子生擢  
授經郎嘗見帝師不拜或諗之曰帝師天子素崇重王  
公大臣見必俯伏作禮公獨不拜何也執敬曰吾孔氏  
之徒知尊孔氏而已何拜異教為歷官至侍御史至正  
七年擢山南道廉訪使俄移湖北道十年授江浙行省  
參知政事十二年二月督海運於平江十日將發官大  
宴犒於海口俄有客船自外至驗其券信令入而不虞

其為海寇也既入港即縱火鼓譟時變起倉卒軍民擾亂賊竟焚舟劫糧以去執敬既走入崑山自咎於失防心鬱鬱不解及還省而昱嶺關有警平章政事伊魯特穆爾引軍拒之賊不得進伊魯特穆爾俄以疾卒賊遂犯餘杭執敬時已被命討賊海上至是事急不得舍去與平章政事鼎鼎治事省中調兵出戰皆不利掾史蘇友龍素抗直有為進言於執敬曰賊且至城內空虛無備奈何執敬曰吾淬礪戈矛當殲賊以報國儻或不克

有死而已何畏哉俄報賊已至執敬遽上馬帥衆而出  
中塗與賊遇乃射死賊四人賊又逐之射死三人已而  
賊來方盛填咽街巷且縱火衆皆潰去賊知其無援呼  
執敬降執敬怒叱之曰逆賊守關吏不謹汝得至此恨  
不碎汝萬段何謂降耶乃奮刀斫賊因中槍而墮從僕  
田額森馳救之亦中槍死事聞贈翰林學士承旨榮祿  
大夫柱國追封魯國公諡

關

金布延薩里字子仁高昌人初為中書省檢校時太師



旺嘉努擅權用事臺諫無敢言者布延薩里獨於衆中  
歷數其過諤諤無懼色拜監察御史即首劾旺嘉努十  
罪乃見黜然而氣節益自振不以摧衄遂阻歷詆權貴  
朝臣莫不畏慄出為廣東廉訪使尋除兵部尚書未幾  
授贛州路達魯噶齊至郡發摘奸惡一郡肅然至正十  
一年潁州盜起即修築城壘旬月之間守禦之具畢備  
於是發公帑募勇士得兵三千人日練習之皆可用屬  
邑有為賊所陷者往往遣兵復之境内悉安十六年以

功拜江西行省參政分省於贛十八年江西下流諸郡  
皆為陳友諒所據乃與總管噶海齊戮力同守友諒遣  
其將幸文才率兵圍贛使人脅之降布延薩里斬其使  
日擐甲登城拒之力戰凡四月兵少食盡義兵萬戶瑪  
哈瑪廸沙欲舉城降賊布延薩里不從遂自頸事聞朝  
廷贈諡愍哀噶海齊守贛尤有功城陷之日賊將脅之  
使降噶海齊謂之曰與汝戰者我也爾賊毋殺贛民當  
速殺我耳遂見殺

周鏜字以聲瀏陽州人篤學通春秋登泰定四年進士  
第授衡陽縣丞再轉大冶縣尹縣有豪民持官府短長  
號為難治鏜狀若尫懦而毅然有威不可犯抑豪強惠  
窮民治行為諸縣最累遷國子助教會修功臣列傳擢  
翰林國史院編修官乃出為四川行省儒學提舉便道  
還家無何盜起湖南北郡縣皆陷瀏陽無城守盜至民  
皆驚竄鏜告其兄弟使遠引自謂我受國恩脫不幸必  
死毋為相累也賊至得鏜欲推以為主鏜唯瞠目厲聲

大罵賊知其不可屈乃殺之鏜同時有謝一魯字至道者亦瀏陽人至元乙亥鄉貢進士嘗為石林書院山長賊陷潭州一魯奉親匿巖谷中官兵復郡邑亡者稍歸乃還理故業俄而賊復至生縛一魯一魯罵賊甚厲舉家咸遇害

聶炳字韞夫江夏人元統元年進士授承事郎同知平昌州事炳蚤孤其母改適自平昌還始知之即迎其母以歸久之轉寶慶路推官會峒徭寇邊湖廣行省右丞

圖沁統兵討之屯於武岡以炳攝分省理問官悍卒所至掠民為俘炳言於圖沁釋其無驗者數千人至正十二年遷知荊門州纔半歲淮漢賊起荊門不守炳出募土兵得衆七萬復荊門又與四川行省平章政事耀珠復江陵其功居多既而蘄黃安陸之賊其勢復振賊將俞君正合兵來攻荊門炳率孤軍晝夜血戰援絕城陷為賊所執極口罵不絕賊以刀抉其齒盡乃斷左臂而支解之未幾賊陷潛江縣達魯噶齊明安岱爾率勇敢

出擊擒其偽將劉萬戶進營蘆狀賊衆奄至出關死其  
家殲焉一子古實哈雅懷印綬去得免明安岱爾唐古  
氏字士元炳同年進士由宿州判官再轉為潛江云

劉畊孫字存吾茶陵州人至順元年進士授承事郎桂  
陽路臨武縣尹臨武近蠻獠畊孫至召父老告之曰吾  
儒士也今為汝邑尹爾父老當體吾教訓其子弟孝弟  
力田暇則事詩書毋自棄以干吾政乃為建學校求民  
間俊秀教之設俎豆習禮讓三年文化大興邑有茶課

歲不過五錠後增至五十錠畊孫言於朝除其額歷建  
德徽州瑞州三路推官所至詳讞疑獄其政績卓然者  
甚衆至正十二年春蘄黃賊攻破湖南畊孫傾家貲募  
義丁以援茶陵賊至輒却故茶陵久不失守十五年轉  
儒林郎寧國路推官歲饑勸富民賑粟活者萬計會長  
鎗軍索諾木已勒程述謝璽等攻寧國畊孫分守城西  
南日署府事夜乘墉固守江浙行省遣參知政事濟農  
格爾來援至則兵已疲矣城恃有援不為備索諾木已

勒知之夜四鼓引衆緣堞而上城遂陷明孫力戰死弟  
燾孫以國學生下第授常寧州儒學正湖南陷常寧長  
吏棄城走民奉印請燾孫為城守城賴以完者一年外  
援俱絕死之長子碩為武昌江夏縣魯湖大使起義兵  
援茶陵亦死之

俞述祖字紹芳慶元象山人由翰林書寫考滿調廣東  
元帥府都事入為國史院編修官已而出為沔陽府推  
官至正十二年蕞黃賊迫州境述祖領民兵守綠水洪



并力捍禦之兵力不支沔陽城陷民兵悉潰述祖為賊  
所執械至其偽主徐壽輝所誘之使降述祖罵不輟壽  
輝怒支解之有子方五歲亦死事聞贈奉訓大夫禮部  
郎中象山縣男

桂諤勒哲永嘉人嘗從江西左丞李多爾留京師得為  
平江路管軍鎮撫為仇家所訴免官會賊攻昱嶺關行  
省遂假前官令從征諤勒哲勇於討賊兩戰闕下皆勝  
尋又與賊鬪為所執其妻弟金德亦被擒皆反縛於樹

臨白刃脅之降金德意未決諤勒哲呼曰金舅男子漢  
即死不可聽賊德曰此言最是因大罵賊怒剖二人之  
腹而死

綽羅字時中蒙古氏登元統元年進士第累官京畿漕  
運副使出知安陸府至正十二年斬賊魯法興犯安陸  
時綽羅募兵得數百人帥以拒賊敗賊前隊乘勝追之  
而賊自他門入亟還兵則城中火起軍民潰亂計不可  
遏乃歸服朝服出坐公堂賊脅以白刃綽羅猶喻以逆

順一賊排綽羅下使拜不屈且怒罵賊酋不忍害拘之  
明日又逼其從亂綽羅疾叱曰吾守土臣寧從汝賊乎  
賊怒以刀斫綽羅左脇斷而死賊憤其不降復以布囊  
囊其屍舁置其家綽羅妻侯氏出大哭且列酒肉滿前  
渴者令飲酒饑者令食肉以紿賊之不防已至夜自經  
死事聞贈綽羅河南行省參知政事贈侯氏寧夏郡夫  
人立表其門曰雙節有馮三者湖廣省一公使也素不  
知書湖廣為寇陷皂隸輩悉起剽殺為盜亦拉三以從

三辭曰賊名惡我等豈可為衆初強之終弗從怒將殺之三遂唾罵賊乃縛諸十字木舁之以行而刳其肉三益罵不止抵江上斷其喉委去其妻隨三號泣俯拾刳肉納布裙中伺賊遠收三血骸脫衣裹之大泣投江而死

博囉特穆爾字國賓高昌人由宿衛補官十三轉而為江東廉訪副使以選為襄陽路達魯噶齊至正十一年盜起汝潁均州鄖縣人田端子等亦聚衆殺官吏博囉

特穆爾將民兵捕斬之未幾行省廉訪司同檄博囉特  
穆爾以其所領兵會諸軍於均房同討賊賊始退而穀  
城光化以急告即帥兵趨穀城而分遣樊城主簿托音  
等趨光化且遣使求糧於襄陽不應遣同知額森布哈  
促之又不應軍乏食不能行乃駐於柴店復遣從子瑪  
哈實哩往告詞甚苦切廉訪分司王僉事本路總管柴  
順禮怒其責望械之適努爾章來獻光化所獲首級且  
言博囉特穆爾在穀城與賊相持未知存歿宜急濟其

糧少緩恐弗及於是脫二人械遣還而命額森布哈與  
萬戶額森特穆爾率數千人會博囉特穆爾以討賊明  
年正月襄陽失守額森布哈等聞之驚潰博囉特穆爾  
領義兵二百人且戰且引至監利縣遇沔陽府達魯噶  
齊耀珠同知沙克善安陸府同知楊珠布哈荆襄提舉  
僧格實哩之師時濱江有船千餘乃糾合義兵丁壯水  
工五千餘人昇以軍號給以刀稍具哨馬五十水陸繼  
進北至石首縣聞中興路亦陷乃議趨岳州就元帥特

濟而道阻不得前仍趨襄陽賊方駐楊湖港乘其不虞擊之獲其船二十七艘生擒賊黨劉雅爾訊得其情進次潛江縣又斬賊數百級獲三十餘船梟賊將劉萬戶許堂主等是日甫止兵未食而賊大至與賊抵暮耀珠等軍各當一面不能救博囉特穆爾被重創麾瑪哈實哩使去曰吾以死報國汝無留此瑪哈實哈泣曰死生從叔父既而博囉特穆爾被執賊請同為逆博囉特穆爾怒罵之遂遇害瑪哈實哈帥家奴求其尸復與賊戰

俱沒於陣舉家死者凡二十六人

彭庭堅字允誠溫州瑞安人擢至正四年進士第授承事郎同知沂州事毀牛皇神祠驅鄰郡上馬賊免民橫急徵斂民甚便之俄以平反獄囚忤上官意遂棄去十年詔選守令以建寧路崇安縣尹起庭堅於家屬鉛山寇周良竊發犯閩闕庭堅禦之有法寇不入境十一年陞同知建寧路總管府事江西寇熾庭堅率民兵克復建陽尋又平浦城十二年攝僉都元帥府事與邵武路



總管吳阿勒坦布哈夾攻邵武庭堅設雲梯火礮晝夜  
攻擊寇遁追斬渠兇董元帥鐵和尚童昌邵武悉平總  
兵官江浙參政章嘉上功於朝陞同知福建道宣慰使  
司副都元帥鎮邵武冬寇陷建寧縣十三年庭堅統建  
陽崇安浦城三縣民兵次泰寧寇懼請降復建寧縣還  
師邵武江浙行省檄庭堅節制建寧邵武二郡諸軍十  
四年盜侵政和松溪江南行臺中丞吳鐸督軍建寧檄  
庭堅至時鎮撫萬戶岳煥隸麾下煥素悍縱卒為暴庭

堅欲繩以法煥懼使部卒乘其不備詐為賊兵突入交鋒衆皆潰庭堅獨留不去遂遇害死年四十三故吏張椿儒士夏志行江晃奉柩還崇安民哀泣如喪父母立祠像歲時祭禱數降靈響旁邑立祠亦如之南行臺監察御史余觀行部巡察獲其賊斬之為上其事贈中奉大夫福建道宣慰使都元帥封忠愍侯

王巴延字伯敬濱州霑化人由湖廣省宣使歷永州祁陽湖州烏程縣尹信州推官至正九年遷知福寧州居

三歲陞福建鹽運副使將行憲府以時方倣擾留已延  
仍領州事未幾賊自邵武間道徧福寧乃與監州額森  
都呀募壯兵五萬分扼險阻賊至楊梅嶺立柵已延與  
子相馳破之賊帥王善俄擁衆直壓州西門胥隸皆解  
散已延麾下唯白挺市兒數百人爾已延射賊不復反  
顧賊以長鎗舂馬馬仆遂見執善說已延曰聞公有惠  
政此州那可無尹公為我尹可乎已延訶善曰我天子  
命官不幸失守義當死肯從汝反乎善怒叱左右搯以

跪弗屈遂毆之已延嚼舌出血嘆善面罵曰反賊殺即  
殺何以毆為吾民天民也汝不可害大丞相親討叛逆  
百萬之師雷擊電掃汝輩小醜將無遺種顧敢爾邪賊  
亦執額森都呼至善厲聲責其拒鬪噤不能對已延復  
唾善曰我殺賊何言拒邪我死當為神以殺汝言訖挺  
頸受刃頸斷涌白液如乳暴屍數日色不變州人哭聲  
連巷賊既殺額森都呼欲釋相官之相詈曰吾與汝不  
共戴天恨不寸斬汝我受汝官邪賊殺之相妻潘氏挈

二女為賊所獲亦罵賊母子同死已延既死賊時覩其  
引兵出入明年州有僧林德誠者起兵討賊乃望空呼  
曰王州尹王州尹宜率陰兵助我斬賊時賊正祠神覩  
紅衣軍來以為偽帥康將軍亟往迎之無有也四面皆  
青衣官軍賊大敗斬其酋江二蠻福寧遂平事聞贈嘉  
議大夫濟南路總管上輕車都尉追封太原郡侯

劉濬字濟川其先興州人曾祖海金進士第一人仕至  
河南府尹死於國難子孫遂家河南濬由廉訪司書吏

調連江縣寧善鄉巡檢至正十三年江西賊帥王善寇  
閩官軍守羅源縣拒之羅源與連江接壤勢將迫濬妻  
真定史氏故相家女也有才識謂濬曰事急矣可聚兵  
以捍一方於是盡出奩中物募壯士百餘命仲子健將  
之浹旬間衆至數萬賊尋破羅源分兩道攻福州濬拒  
之辰山三戰三捷俄聞福州陷衆多潰去濬獨帥健兵  
進遇賊於中麻突其陣斬前鋒五人賊兵大至鏖戰三  
時頃濬中箭墮馬健下馬掖之俱被獲濬忿戰手大罵

賊縛濬階下先斫手一指罵彌厲再斫一指亦如之指  
且盡斫兩腕次及兩足濬色不少變罵聲猶不絕遂割  
其喉舌而死健亦以死拒賊善義之舍健使歛濬屍瘞  
之健歸請兵於帥府以復父讎弗聽健盡散家貲結死  
士百人詐為工商流丐入賊中夜半發火大譟賊驚擾  
自相屠戮健手斬殺其父者張破四并擒善及寇首陳  
伯祥來獻磔之事聞贈濬福建行省檢校官授健古田  
縣尹官為濬立祠福州北門外有司歲時致祭云

托里布哈字端甫蒙古人始為宿衛官累歷顯要擢遼陽行省右丞陞平章政事陳友諒陷江西詔拜江西行省平章政事與平章政事阿爾和碩等分道進討遂泛海南下趨廣東駐師揭陽降土寇金元祐招復循梅惠三州之寇承制官其酋長俾治賊以給兵食又別規粟四千石輸送京師自是英肇欽連諸郡皆附且治兵由梅嶺以圖江西而元祐有異志託以鎮服其土遮道固留先是制書命劉巨海僉廣東元帥府事未發元祐竊



取易其名私畀猛賊劉文遠誘與偕亂事覺文遠伏誅而元祐及其弟元泰子榮竄匿不獲俄榮率外賊突入奪符信殺官吏變起倉卒衆莫能支托里布哈與參政楊泰元等勒兵拒戰而賊來益衆托里布哈為鎗所中創甚其子達蘭布哈率麾下力與抗死之托里布哈遂被執擁至太平橋罵不絕口遂為賊殺其妻布延氏妾高麗氏在側不去皆大罵曰我平章遇爾父子厚矣爾父子何暴逆至此亦皆遇害其部將哈奇爾吳布延阿

拉克布哈廸延布哈等俱戰死

伊蘇台其父世延自有傳由四川行省左右司郎中西  
行臺監察御史河西廉訪副使轉黃州路總管湖廣既  
陷朝廷察其材升四川行省參政命與平章耀珠討賊  
耀珠軍五千乃分銳卒八百使伊蘇台為前驅賊方據  
巴東縣攻拔之是時歸峽等州皆為賊所守伊蘇台破  
賊江上斬溺無算已而歸峽平又進拔枝江松滋兩縣  
乘勝趨江陵賊出陣清水門鏖戰至夕賊退入城乃據

其門埃耀珠軍至黎明賊出戰三時頃耀珠軍止百步  
外不救賊飛槍刺之遂死事聞贈榮祿大夫陝西行省  
平章政事柱國追封涼國公諡忠壯

陳君用字子材延平人少負氣勇猛過人紅巾起江淮  
由撫盱入閩閩閩授君用南平縣尹給錢五萬緡俾募  
千兵君用散家財繼之導官軍復建陽浦城等縣以功  
授同知建寧路事亡何賊圍福州君用率兵往援大敗  
賊衆廉訪僉事郭興祖佩君用明珠虎符使權同知副

都元帥遂引兵踰北嶺至連江阻水而陣君用曰今日  
不盡殺賊吾不復生還矣乃率壯士六十人徒步斬殺  
賊稍潰既而復合君用大呼轉戰中槍而死事聞贈懷  
遠大將軍浙東道宣慰司同知副元帥輕車都尉潁川  
郡侯諡忠毅

布琳尼敦北庭人累官至山南廉訪使治中興中興為  
江漢藩屏布琳尼敦每按臨所部威惠翕然至正十二  
年寇犯中興布琳尼敦以兵與抗射賊多死賊稍退明

日復擁衆來襲東門布琳尼敦力與之戰被執不屈而死又明日賊復來攻前中興判官上都統兵出擊之既而東門失守上都倉黃反鬪力屈賊執之使降上都大罵賊怒剗其腹刮其肉而死

綽哈扎拉台氏由國子生入官為靖安縣達嚕噶齊至正十二年斬黃賊起綽哈與縣尹黃紹同集義兵為禦賊計未幾賊兵數萬由武寧來寇紹赴行省求援綽哈獨率衆與戰於象湖大破之乃起進士胡斗元塗淵舒

慶遠甘棠等謀畫而以勇士黃雲為前鋒自二月至於八月戰屢捷擒賊將洪元帥而賊黨益盛黃雲戰死我軍挫衄綽哈遂被圍尋為賊所執殺於富州子明安圖襲父職為本縣達嚕噶齊十三年帥眾敗走賊將復縣治十四年賊兵復至明安圖迎戰力竭賊執而梟之紹字仲先臨川人登至正八年進士第以求援出靖安而道阻絕遇官軍護紹得入龍興而龍興亦被圍其後圍解紹乃與明安圖招諭叛境過建昌之高坪遇賊紹與

戰不勝正衣冠怒罵為賊所害斗元字元浩靖安人至  
正十年領江西鄉薦第一下第署鰲溪書院山長賊至  
靖安掠斗元鄉里斗元以鄉兵擊敗之入縣治與綽哈  
共圖戰守及綽哈被執賊脅之使降斗元罵不屈乃以  
土埋其腰不死又縛置暗室斗元仆牆以出逃入深山  
狂罵而死黃雲撫州人寓靖安素以勇捷稱每接戰獨  
以身當敵嘗為數十人所圍即奮身躍出至是身中數  
十鎗噴血罵賊而死

魏中立字伯時濟南人由國子伴讀歷官至陝西行臺御史中丞遷守饒州賊既陷湖廣分攻州郡官軍多疲懦不能拒所在無賴子多乘間竊發不旬日衆輒數萬皆短衣草屨齒木為杷削竹為槍截緋帛為巾襦彌野皆赤中立聞警即率兵壯分塞險要戒守備俄而賊至達嚕噶齊莽齎出戰不能發一矢賊愈偪中立以義兵擊卻之已而賊復合遂為所執以紅衣被其身中立叱之須髯盡張賊執歸斲水欲屈其從己中立大罵不已



遂被害未幾賊又犯信州信州總管于大本以土兵備  
禦賊首項甲破東門而入執大本至蘄水為俘獻偽主  
釋其縛昇偽印一紐且命以官大本投印於地而指偽  
主痛詈之遂亦遇害大本字德中密州人始由儒學教  
諭入官云

元史卷一百九十五

元史卷一百九十五考證

巴延布哈德濟傳 按傳所載世次名字質之虞集高

昌王世勛碑文多不合

樊執敬謚 按執敬謚法無可考從原文闕疑

聶炳傳至正十二年遷知荆門州纔半歲荆門不守

按本紀荆門之陷在至正十二年春正月戊申則炳  
遷職或在十一年不然半歲云云與紀所繫正月不  
符

桂鄂勒哲 按名賢錄及溫州志作季姓

王巴延 志作王簡傳云巴延字伯敬其明徵也元史

類編依志作王簡

欽定四庫全書

元史卷一百九十六

明翰林學士亞中大夫知制誥兼修國史宋濂等修

列傳第八十三

忠義四

布延布哈字希古蒙古氏倜儻有大志至正五年由國子生登右榜進士第一人授翰林修撰調河南行省員外郎十一年遷江西行省左右司郎中靳黃徐壽輝來

寇布延布哈戰守之功為多語在道通傳十六年除江  
西廉訪副使頃之召還授益都路達魯噶齊遷山東廉  
訪使再轉為中書參知政事十八年詔與治書侍御史  
李國鳳同經畧江南至建寧江西陳友諒遣鄧克明來  
寇而平章政事阿魯烏遜等皆夜遁國鳳時分鎮延平  
城陷遁去布延布哈曰我承制來此去將何之誓與此  
城同存亡耳命築各門甕城前後拒戰六十四日既而  
大敗賊衆明年召還授山東宣慰使再轉知樞密院事

平章山東行省守禦益都大明兵壓境布延布哈捍城  
力戰城陷而平章政事巴拜出降布延布哈還告其母  
曰兒忠孝不能兩全有二弟當為終養拜母趨官舍坐  
堂上主將素聞其賢召之再三不往既而面縛之布延  
布哈曰我元朝進士官至極品臣各為其主不屈死之  
先是其妻阿爾展歷呼家人告之曰我夫受國恩我亦  
封齊國夫人今事至此唯有死耳家人莫不歎息泣下  
已而布延布哈二弟之妻各抱幼子及婢妾溺舍南井

死比阿爾展欲下而井填咽不可容遂抱子投舍北井  
其女及妾女孫女皆隨溺焉是時有申榮者平章山東  
行省守東昌榮見列郡皆降告其父曰人生世間不能  
全忠孝者兒也父曰何為榮曰城中兵少不敵戰則萬  
人之命由兒而廢但有一死報國耳遂自經

閔本字宗先河內人性剛正敏給而刻志於學早歲得  
推擇為禮部令史御史大夫布哈奇本之才辟以為掾  
平反冤獄甚有聲擢御史臺照磨頃之遷樞密院都事



拜監察御史遷中書左司都事五轉為吏部尚書移刑  
戶二部皆以能見稱本素貧且有目疾嘗上章乞謝事  
不允詔授集賢侍講學士大明兵薄京師本謂其妻程  
氏曰國事至此吾知之久矣愧不能立功補報敢愛六  
尺軀苟活哉程氏曰君能死忠我尚有愛於君乎本乃  
朝服與程氏北向再拜大書於屋壁曰元中奉大夫集  
賢侍講學士閔本死遂各縊焉二女長真真次女女見  
本死呼天號泣亦自縊於其傍有拜珠者喀喇人也字

聞善以材累官至翰林國史院都事為太子司經兵至拜珠謂家人曰吾始祖哈哩巴封河東公者與太祖同事王汗太祖取王汗收諸部落吾祖引數十騎馳西北方太祖使人追問之曰昔者與皇帝同事王汗王汗今已滅欲為之報仇則帝乃天命逆天不祥欲改事帝則吾心有所不忍故避之於遠地以沒吾生耳此吾祖之言也且吾祖生朔漠其言尚如此今吾生長中原讀書國學而可不知大義乎況吾上世受國厚恩至吾又食

祿今其國破尚忍見之與其苟生不如死遂赴井死其家人瘞之舍東悉以其書籍焚之為殉云

趙弘毅字仁卿真定晉州人少好學家貧無書傭於巨室晝則為役夜則借書讀之或閔其志但使總其事而不役焉嘗受經於臨川吳澄始辟翰林書寫再轉為國史院編修官調大樂署令大明兵入京城弘毅嘆息曰忠臣不二君烈女不二夫此古語也我今力不能救社稷但有一死報國耳乃與妻解氏皆自縊其子恭中書

管勾與妻子訣曰今乘輿北奔我父子食祿不能效尺寸力吾父母已死尚何敢愛死乎或止之曰我曹官卑何自苦如此恭叱曰爾非我徒也古者忠義人各盡自心豈問職之崇卑乎遂公服北向再拜亦縊死恭女官奴年十七見恭死方大泣適隣嫗數輩來相率出避曰我未適人避將何之不聽嫗欲力挽之女曰人生在世便百歲亦須一死乃潛入中堂解衣帶自經

鄭玉字子美徽州歙縣人幼敏悟嗜學既長覃思六經

尤邃於春秋絕意仕進而勤於教學者門人受業者衆  
所居至不能容學者相與即其地構師山書院以處焉  
玉為文章不事彫刻煅煉流傳京師揭傒斯歐陽玄咸  
加稱賞至正十四年朝廷除玉翰林待制奉議大夫遣  
使者賜以御酒名幣浮海徵之玉辭疾不起而為表以  
進曰名爵者祖宗之所以遺陛下使與天下賢者共之  
者陛下不得私予人待制之職臣非其才不敢受酒與  
幣天下所以奉陛下陛下得以私與人酒與幣臣不敢

辭也玉既不仕則家居日以著書為事所著有周易纂  
註十七年大明兵入徽州守將將要致之玉曰吾豈事  
二姓者耶因被拘囚久之親戚朋友攜具餉之則從容  
為之盡歡且告以必死狀其妻聞之使語之曰君苟死  
吾其相從地下矣玉使謂之曰若果從吾死吾其無憾  
矣明日具衣冠北向再拜自縊而死

黃暉字殷士撫州金谿人博學明經善屬文尤長於詩  
至正十七年用左丞相太平奏授淮南行省照磨未行

除國子助教遷太常博士轉國子博士陞監丞擢翰林  
待制兼國史院編修官二十八年京城既破喁歎曰我  
以儒致身累蒙國恩為胄子師代言禁林今縱無我戮  
何面目見天下士乎遂赴井而死年六十一有詩文傳  
於世

拜特穆爾字君壽蒙古人家世歷履無所考居官所至  
以廉能著聲至正中累遷為福建行省左右司郎中行  
省治福州二十七年大明以騎兵出杉關取邵武以舟

師由海道趣閩奄至城下拜特穆爾知城不可守引妻妾坐樓上慷慨謂曰丈夫死國婦人死夫義也今城且陷吾必死於是若等能吾從乎皆泣曰有死而已無他志也縊而死者六人有十歲女度其不能自死則紿之曰汝稽顙拜佛庶保我無恙也甫拜即挈米囊壓之死乳媪抱其幼子旁立以泣拜特穆爾熟視之歎曰父死國母死夫妻與女從父者也皆當死汝三歲兒於義何所從乎為宗祀計可也乃命媪抱匿旁近民舍而歛金



珠界之曰即有緩急可以此贖兒命有頃兵入城即舉燈自燃四圍憲火大發遂自焚死

德呼默色字子初回回人性剛介事母至孝年四十猶不仕或問之曰吾不忍舍吾母以去也以宿衛年勞授行宣政院崇教三遷為漳州路達嚕噶齊居三年民甚安之時陳友定據全閩八郡之政皆用其私人以總制之朝廷命官不得有所與大明兵既取福州興化泉州皆納款或以告德呼默色仰天嘆曰吾不材位三品國

恩厚矣其何以報乎報國恩者有死而已亡何吏走白  
招諭使者至請出城迓之德呼默色從容語之曰爾第  
往吾行出矣乃詣廳事具公服北面再拜畢引斧斫其  
印文又大書手版曰大元臣子即入位端坐拔所佩刀  
割喉中以死既死猶手執刀按膝坐儼然如生時郡民  
相聚哭庭中歛其屍葬東門外時又有和爾多卜丹者  
回回人由進士累官僉廣東廉訪司事有呂復者為江  
西行省左右司都事皆閒寓福州而復以行省命攝長

樂縣尹福州既下和爾多卜丹曰吾兄弟三人皆忝進  
士受國恩四十年今雖無官守然大節所在其可辱乎  
以石繫腰投井死復亦曰吾世君祿今雖攝官若不以  
死報國則無以見先人於地下引繩自經死和爾多卜  
丹兄曰穆壘丹者官建康曰海瑠丹者官信州先是亦  
皆死國難云

保賽音布哈字德中素隆噶台人有膂力善騎射由舒  
庫爾齊授利器庫提點再轉為資正院判官累遷同知

樞密院事遷翰林學士尋陞承旨賜虎符兼巡軍合浦  
全羅等處軍民萬戶都元帥除大司農出為嶺北行省  
右丞陞平章政事至正二十四年甘肅行省以博囉特  
穆爾矯弑皇后皇孫遣人白事平章政事伊蘇岱爾即  
欲署諭衆榜保賽音布哈持不可曰此大事何得輕信  
況非符驗公文卒不署榜既而果妄傳會皇太子撫軍  
冀寧承制拜保賽音布哈翰林學士承旨遷集賢大學  
士又為宣政院使遂拜中書平章政事大明兵逼京師

詔保賽音布哈以兵守順承門其所領兵僅數百羸卒而已乃嘆息謂左右曰國事至此吾但知與此門同存亡也城陷被執以見主將唯請速死不少屈主將命留營中終不屈殺之是時有張庸者字存中溫州人性豪爽精太乙數會世亂以策干經畧使李國鳳承制授庸福建行省員外郎治兵杉關頃之計事赴京師因進太乙數圖順帝喜之擢祕書少監皇太子立大撫軍院命庸團結房山遷同僉將作院事又除刑部尚書仍領團

結會諸寨既降庸守駱駝谷遣從事段禎請援於庫庫特穆爾不報庸獨堅守拒戰衆將潰庸無去志已而寨民李世傑執庸出降以見主將庸不屈與禎同被殺丁好禮字敬可真定蠡州人精律算初試吏於戶部辟中書掾授戶部主事擢江南行臺監察御史復入戶部為員外郎拜監察御史又入戶部為郎中陞侍郎除京畿漕運使建議置司於通州重講究漕運利病著為成法人皆便之除戶部尚書時國家多故財用空乏好禮

能撙節浮費國家用度賴之以給拜參議中書省事遷  
治書侍御史出為遼陽行省左丞未行留為樞密副使  
至正二十年遂拜中書參知政事時京師大饑天壽節  
廟堂欲用故事大譙會好禮言今民父子有相食者君  
臣當修省以弭大患譙會宜減常度不聽乞謝事乃以  
集賢大學士致仕給全俸家居庫庫特穆爾扈從皇太  
子還京輸山東粟以遺朝貴饋好禮麥百石好禮不受  
二十七年復起為中書平章政事尋以論議不合謝政

去特封趙國公大明兵入京城或勉其謁大將好禮叱之曰我以小吏致位極品爵上公今老矣恨無以報國所欠惟一死耳後數日大將召好禮不肯行昇至齊化門抗辭不屈而死年七十五是日中書參知政事郭庸亦昇至齊化門衆叱之拜庸曰臣各為其主死自吾分何拜之有語不少屈而死庸字允中蒙古氏由國學生釋褐出身累遷為陝西行臺監察御史與同列劾知樞密院事額森特穆爾喪師左遷中興總管府判官其後



額森特穆爾以罪黜召拜監察御史累轉參政中書其  
節義與好禮並云

元史卷一百九十六

元史卷一百九十六考證

布延布哈傳 按宰相表布延布哈至正十八年十月

由經畧使除中書參政傳載參政在前經畧在後與表互異

丁好禮傳至正二十七年復起為中書平章政事 按

本紀好禮由集賢大學士為添設平章非正除也又

傳內附載郭庸為陝西行臺監察御史與同列劾額

森特穆爾左遷中興總管府判官按本紀時西臺諫

臣皆斥為各路添設佐貳則庸之為判官亦非正授

欽定四庫全書

元史卷一百九十七

明翰林學士亞中大夫知制誥兼修國史宋濂等修

列傳第八十四

孝友一

世言先王沒民無善俗元有天下其教化未必古若也而民以孝義聞者蓋不乏焉豈非天理民彝之存於人心者終不可泯歟上之人苟能因其所不泯者復加勸

獎而興起之則三代之治亦可以漸復矣今觀史氏之所載其事親篤孝者則有臨江劉良臣汴梁陳善同官強安瀋州高守質安豐高澤鞏昌王欽修武員思忠榆縣王士寧河南朱友諒泉州葉森寧陵呂德汲縣劉淇建昌鄭佛生堂邑張復亨保定邢政寧夏趙諾海臨潼任居敬隴西周慶徐德興汝寧李從善華州任敬色目氏實廸其居喪廬墓者則有太原王構萊州任梓平灤王振北京張洪範登封王佐下蔡許從政張鎡富平王

賈僧鄭州段好仁趙璧薛明善張齊汴梁韓榮劉斌張  
裕何泰史恪高成鄧孝祖李文淵杜天麟張顯祖涇陽  
張國祥延安王旻東昌張翬永平梁訥高唐鄭榮劉居  
敬同州趙良南陽周郁陳介劉權大同高著江都毛翔  
歸德葛祥張德成張遜王珪劉弼汲縣徐昌祖真定宋  
貞玉世賢晉寧何溥保定耿德溫張行一賈秉實張勗  
河南王宗道孫喬瓜爾佳天祐趙州趙德隆安豐王德  
新石思讓冀寧何溥大都王麟李簡華陰李寧屈秀懷

慶侯榮丁用郭天一耀州王思中年閭讓曹州鄧淵呂  
政徐州胡居仁張允中衛輝王慶福建朱虞龍隨州高  
可燾濟寧魏鐸武康王子中淮安翟諱汶上趙恒須城  
許時中衡山歐陽誠復江陵穆堅薊州王欽定陶元顯  
祖絳州姚好知宿州孫克忠集慶傅霖濟南宋懷忠牟  
克孝汝寧張郁泉州黃道賢谷城王福解州靖與曾般  
陽戴貞兗州王治沔陽徐勝祖興中舒穆魯昌齡峽州  
秦桂華蒙古色目氏納喇丹齊蘇默格濟阿哈瑪特拜



珠茂巴爾伊嚕音特穆爾索珠唐古特音札嚕李多羅  
岱塔塔森岱爾其累世同居者則有休寧朱震雷池州  
方時發河南李福真定杜良華州王顯政建寧王貴甫  
句容王榮周成鄔陵夏全保定成珪開平溫義大同王  
瑞之平江湯文英鄺州員從政江州范士奇涇州李子  
才宿州王珍其散才周急者則有河南高頴和台州程  
遠大潭州湯居恭李孔英建康湯大有吉州劉如翁嚴  
用父高唐孟恭松江管仲德章夢賢夏春江陵陳一寧

中興傳文鼎永州唐必榮濟南李恭寧夏何惠月天子  
皆嘗表其門閭或復其家故援唐史之例具列姓名於  
篇端擇其事跡尤彰著者復別為之傳云

王閏東平須城人父素多貲既老盡廢之不甘淡薄每  
食必須魚肉閏朝夕勤苦入市營奉無闕父性復乖戾  
閏左右承順甚得其歡心鄉里稱焉父嘗臥疾夜燃長  
明燈室中火延籬壁間閏聞火聲驚起馳救火已熾煙  
燄蔽寢戶閏突入火中解衣蒙父抱而出肌體灼爛而

父無少傷一女不能救遂焚死中統二年復其役

郭道卿興化莆田人四世祖義重至孝宋紹興間有詔  
旌之鄉里為立孝子祠至元初內附閩盜起居人竄匿  
道卿與弟佐卿獨守孝子祠不忍去遂俱被執盜將殺  
佐卿道卿泣告曰吾有兒已長弟弱子幼請代弟死佐  
卿亦泣告曰吾家事賴兄以理請殺我道卿固引頸請  
刃盜相顧曰汝孝門兄弟若此吾何忍害兩釋之道卿  
年八十子廷煒為建寧路平準行用庫使辭歸侍養道

卿嘗病疝危甚廷煒憂瘁扶護一夕髮盡白有司言狀旌之

蕭道壽京兆興平人家貧鬻鍼以自給母年八十餘道壽事養盡禮每旦候母起夫婦親侍盥櫛日三飯必待母食然後退就食至夕必待母寢然後退就寢出外必以告母許乃敢出母或怒欲罰之道壽自進杖伏地以受杖足母命起乃起起復再拜謝違教拱立左右俟色喜乃退母嘗有疾醫累歲不能療道壽刲股肉啖之而

愈至元八年賜羊酒表其門

郭狗狗平陽翼城人父寧為欽察先鋒使首領官戍大良平宋將史太尉來攻夜陷大良平寧全家被俘史將殺寧狗狗年五歲告史曰勿殺我父當殺我史驚問寧曰是兒幾歲耶寧曰五歲史曰五歲兒能為是言吾當全汝家即以騎送寧等往合州道遇國兵騎驚散寧家俱得還御史以事聞命旌之

張閏延安延長縣人隸軍籍八世不異爨家人百餘口

無間言日使諸女并諸婦各聚一室為女工畢歛貯一庫室無私藏幼稚啼泣諸母見者即抱哺一婦歸寧留其子衆婦共乳不問孰為已兒兒亦不知孰為已母也閨兄顯卒即以家事付姪聚聚辭曰叔父行也叔宜主之閨曰姪宗子也姪宜主之相讓既久卒以付聚措紳之家自謂不如至元二十八年旌表其門又有蕪湖芮世通十世同居峽州向存義汴梁丁煦八世同居州縣請於朝並旌美

田改住汶上人父病不能愈禱於天去衣臥冰上一月  
同縣王住兒母病臥冰上半月

甯珠赫山丹州人母年七十餘患風疾藥餌不效珠赫  
割股肉進啖遂愈歲餘復作不能行珠赫手滌溷穢護  
視甚周造板輿載母夫婦共舁行園田以娛之後卒居  
喪有禮鄉閭稱焉潭州萬戶伊喇瓊子李嘉努九歲母  
病醫言不可治李嘉努剖股肉煮糜以進病乃痊撫州  
路總管管如林潭州民朱天祥並以母疾剖股旌其家

布延蘇達勒默呼氏家秦州父喪廬墓次晝夜悲號有  
飛鳥翔集墳土踴起又有尹夢龍中興人母喪負土爲  
墳結廬居其側手書孝經千餘卷散鄉人讀之有羣鳥  
集其冢樹

樊淵建康句容人幼失父事母篤孝至元十二年奉母  
避兵茅山兵至欲殺其母淵抱母號哭以身代死兵兩  
釋之三十年江東廉訪使者辟為吏母亡奔喪哀感行  
路服闋奉神主事之起居飲食十年如平生臺憲交薦



淵不忍去墳墓終不起延祐間汀州寧化人賴祿孫母  
病值蔡五九作亂負母從邑人避南山盜至衆散走祿  
孫守母不去盜將刃其母祿孫以身翼蔽曰勿傷吾母  
寧殺我母渴不得水祿孫含唾煦之盜相顧駭歎不忍  
害反取水與之有掠其妻去者衆責之曰奈何辱孝子  
婦使歸之事聞並賜褒表

劉德泉汴梁杞縣人早喪母父榮再娶王氏生二子居  
敬居元俱幼德泉甚撫之及王氏病卒乃益相友愛至

元末歲飢父欲使析居德泉泣止不能得乃各受其業  
以去久之父卒兄弟相約同爨和好如初至治三年真  
定朱顯自至元間其祖父已分財至顯念姪彥昉等年  
幼無恃謂弟耀曰父子兄弟本同一氣可異處乎乃會  
拜祖墓下取分券焚之復與同居延祐間蔚州吳思達  
兄弟六人嘗以父命析居思達為開平縣主簿父卒還  
家治葬畢會宗族泣告其母曰吾兄弟別處十餘年矣  
今多破產以一母所生忍使兄弟苦樂不均耶即以家

財代償其逋更復共居母卒哀毀甚宅後柳連理人以  
為友義所感又有朱汝諧濮州人父子明嘗命與兄汝  
弼別產子明卒汝弼家盡廢汝諧泣請共居仲父子昭  
子玉貧病汝諧迎至家奉湯藥甘旨甚謹後卒喪葬盡  
禮鄉人賢之州縣各以名聞表其閭

郭回邵武人素貧年六十無妻奉母寄宿神祠中營養  
甚艱母年九十八卒回傭身得錢葬之每旦詣墳哭祭  
十四年不輟州上狀命給衣糧贍濟仍表異之

孔全亳州鹿邑人父成病刲股肉啖之愈後卒居喪盡  
哀廬墓左負土為墳日六十肩風雨有虧俟霽則補之  
三年起墳廣一畝高三丈餘張子夔安西人父喪每夜  
半以背負土肘膝行地匍匐至葬所篩細土為墳陳乞  
兒歸德夏邑人年九歲母喪哀毀親負土為墳高一丈  
廣十六步人憫其幼欲助之則泣拜而辭又有峨眉趙  
國安解州張琛南陽李庭瑞息州伊喇巴延南陽齊哩  
克岱皆居喪有至行廬墓負土為墳並以有司所請表

異之

楊一懷孟人至元間憐其叔清家貧密以分契詣神祠  
焚之與清同居者三十年無間言張本東昌荏平人篤  
孝事伯父叔父皆甚謹伯父嘗病本晝夜不去側復載  
以巾車步挽詣岱嶽禱之張慶真定人善事繼母伯父  
泰異居河南慶聞其貧迎歸養之供饌豐備過於所生  
元善大名人父有昆弟五人因貧流散江淮久之遂客  
死至大四年善往尋其體骨并迎弟姪等一十五喪而

歸改葬祖父母以諸喪序列祔於塋次州縣以聞並旌其家

趙毓唐州人父福遷鄭之管城其先三世同爨毓官福州司獄滿歸以母老不復仕一日會諸弟泣申遺訓願世世無異處且祝天軟血以盟自是大小百口畧無間言同力合作家道以殷毓長兄瑞早世嫂劉氏守志毓率家人事之甚恭次兄選繼歿嫂王氏毓母以其少許歸改嫁王氏曰婦無再嫁之義願終事姑毓妹贅王佑

佑亡妹念佑母無子乞歸朱氏養之人謂孝友節義萃毓一家元貞初旌之

胡光遠太平人母喪廬墓一夕夢母欲食魚晨起號天將求魚以祭見生魚五尾列墓前俱有嚙痕鄰里驚異方共聚觀有獺出草中浮水去衆知是獺所獻以狀聞於官表其閭至順間永平龐遵母病腫三年不能起忽思食魚遵求於市不得歸途歎恨忽有鯉躍入其舟作羹以獻母悅病瘥

陳韶孫廣州番禺人父瀏以罪流肇州韶孫年十歲不忍父遠謫朝夕號泣願從父不能奪遂與俱往跋涉萬里不憚勞苦道過遼陽平章達春見而憫焉語之曰天子寬仁罰不及嗣邊地苦寒非汝所堪吾返汝故鄉汝願之乎韶孫曰既不能以身代父當死生以之歸非所願也達春驚異以錢賞之大德六年瀏死韶孫哀慟見者皆為之泣下肇州萬戶府以聞命遣還鄉里仍旌異之



李忠晉寧人幼孤事母至孝大德七年地大震郇保山  
移所過居民廬舍皆推壓傾圯將近忠家分為二行五  
十餘步復合忠家獨完吳國寶雷州人性孝友父喪廬  
墓大德八年境內蝗害稼惟國寶田無損人皆以為孝  
感所致云

李茂大名人徙家揚州父興壽臨卒語茂曰吾病且死  
爾善事母茂泣受命奉母孟氏益謹母嘗病目失明茂  
禱於泰安山三年復明又願母壽每日祝天乞損已年

蓋母孟氏竟年八十四而歿居喪哀慟聞者傷之大德  
九年揚州再火延燒千餘家火及茂廬皆風返而滅事  
聞旌之

羊仁廬州廬江人至元初阿珠兵南下仁家為所掠父  
被殺母及兄弟皆散去仁年七歲賣為汴人李子安家  
奴力作二十餘年子安憐之縱為良仁踪蹟得母於潁  
州蒙古軍塔海家兄於睢州蒙古軍約尼家弟於邯鄲  
連大家皆為役尚無恙乃徧懇親故貸得鈔百錠歷詣

諸家求贖之經營百計更六年乃得遂大小二十餘口  
復聚居為良孝友甚篤鄉里美之大德十二年旌其家  
又有黃覺經建昌人五歲因亂失母稍長誓天誦佛書  
願求母所在乃渡江涉淮行乞而往衝冒風雪備歷艱  
苦至汝州梁縣春店得其母以歸章鄉孫蜀人本劉氏  
幼為章提刑養子與母富氏相失三十八年遍訪於江  
西諸郡迎歸養之俞全杭州人幼被掠賣為劉饒家奴  
後獲為良自汴步歸杭尋其母及姊得之事母以孝聞

李鵬飛池州人生母姚氏為嫡母不容改嫁為朱氏妻  
鵬飛幼不知也年十九思慕哀痛誓學醫以濟人願早  
見母行求三歲至蘄州羅田縣得焉時朱氏家方疫鵬  
飛起之遂迎還奉養久之復歸朱氏時渡江省覲既卒  
歲時攜子孫往祭奠終其身並以有司所請旌其閭

趙一德龍興新建人至元十二年國兵南伐被俘至燕  
為鄭留守家奴歷事三世號忠幹至大元年一日拜請  
其主鄭阿爾斯蘭及其母澤國太夫人曰一德自去父

母得全生依門下者三十餘年矣故鄉萬里未獲歸省  
雖思慕刻骨未嘗敢言今父母已老脫有不幸則永為  
天地間罪人矣伏地涕泣不能起阿爾斯蘭母子皆感  
動許之歸期一歲而返一德至家父兄已歿惟母在年  
八十餘一德卜葬二柩畢欲少留事母懼得罪如期還  
燕阿爾斯蘭母子嘆曰彼賤隸乃能是吾可不成其孝  
乎即裂券縱為良一德將辭歸會阿爾斯蘭以冤被誅  
詔籍其家羣奴各亡去一德獨奮曰主家有禍吾忍同

路人耶即留不去與張錦童詣中書訴枉狀得昭雪還其所籍太夫人勞一德曰當吏籍吾家時親戚不相顧汝獨冒險以白吾枉疾風勁草於汝見之令吾家業既喪而復存者皆汝力也吾何以報汝因分美田廬遺之一德謝曰一德雖鄙人非有利於是也重哀吾主無罪而受戮故留以報主今老母八十餘得歸侍養主之賜已厚矣何以田廬為遂不受而去皇慶元年旌其門王思聰延安塞人素力田農隙則教諸生得束脩以

養親母喪盡哀父繼娶楊氏事之如所生以家多幼稚  
侵父食別築室曰養老堂奉之朝夕定省愈久不怠父  
嘗病劇思聰憂甚拜祈於天額膝皆成瘡得神泉飲之  
愈後復失明思聰舐之即能視縣上狀命表異之

徹辰台奎蘇氏幼喪父事母篤孝稍壯母歿慟哭頓絕  
水醬不入口者三日既葬居喪有禮每節序祭祀哭泣  
常如袒括時年四十餘思慕猶如孩童每見人父母則  
嗚咽流涕人問其故曰人皆有父母我獨無是以泣耳

至大三年褒異之

王初應漳州長泰人至大四年二月從父義士樵劉嶺山有虎出叢棘中搏義士傷右肩初應赴救抽鎌刀刺虎鼻殺之義士得生泰定二年同縣施合德父真祐嘗出耘為虎扼於田合德與從弟發仔持斧前殺虎父得生並旌其門

鄭文嗣婺州浦江人其家十世同居凡二百四十餘年一錢尺帛無敢私至大間表其門文嗣歿從弟大和繼



主家事益嚴而有恩家庭中凜如公府子弟稍有過頌  
白者猶鞭之每遇歲時大和坐堂上羣從子皆盛衣冠  
鴈行立左序下以次進拜跪奉觴上壽畢皆肅容拱手  
自右趨出足武相銜無敢參差者見者嗟慕謂有三代  
遺風狀聞復其家部使者余闕為書東浙第一家以褒  
之大和方正不奉浮屠老子教冠婚喪葬必稽朱熹家  
禮而行執親喪哀甚三年不御酒肉子孫從化皆孝謹  
雖當仕宦不敢一毫有違家法諸婦惟事女工不使預

家政宗族里閭皆懷之以恩家畜兩馬一出則一為之不食人以為孝義所感有家範三卷傳於世

王薦福寧人性孝而好義父嘗疾甚薦夜禱於天願減己年益父壽父絕而復甦告其友曰適有神人黃衣紅帕首恍惚語我曰汝子孝上帝命錫汝十二齡疾遂愈後果十二年而卒母沈氏病渴語薦曰得瓜以啖我渴可止時冬月求於鄉不得行至深輿嶺值大雪薦避雪樹下思母病仰天而哭忽見巖石間青蔓離披有二瓜

馬因摘歸奉母母食之渴頓止兄孟韜早世嫂林氏更  
適劉仲山仲山嘗以田鬻於薦及死不能葬且無子族  
以其貧莫肯為之後薦即以田還之使置後且治葬焉  
州禁民死不葬者時民貧未葬者衆畏令悉焚柩棄骨  
野中薦哀之以地為義阡收瘞之有死不能斂者復買  
棺以贈人皆感焉至大四年其鄉旱民艱糴薦盡出儲  
粟賑之有施福等十一家飢欲死薦聞惻然欲濟之家  
粟已竭即以已田易穀百石分給之福等德其活已每

月朔會佛祠為祈福福建宣慰司上狀旌之

郭全遼陽人幼喪母哀戚如成人及壯父庭玉又卒居廬三載啜粥面墨事繼母唐古氏甚孝唐古氏生四子皆幼全躬耕以養既長娶婦各求分財異居全不能止凡田廬器物悉自取朽敝者奉唐古氏以居甘旨無乏唐古氏卒全年六十餘哀痛毀瘠廬其墓終喪又有劉德奉元人父娶後妾何氏德事之如所生家貧傭工取直寸錢尺帛皆上之四弟並何出德撫愛又篤年五十

未娶稱貸得錢先為弟求婦諸弟亦化其德一門藹然鄉里稱為劉佛子瑪雅噶伊魯勒昆氏素貧事繼母張氏庶母呂氏克盡子職劉居敬大都人年十歲繼母郝氏病居敬憂之懇天以求代狀聞並褒表之

楊皞扶風人父清母牛氏牛氏嘗病劇皞叩天求代遂痊如是者再後牛氏失明皞登太白山取神泉洗之復如故牛氏歿哀毀特甚葬之日大雨獨皞墓前後數里密雲蔽之雨不沾土送者大悅葬畢令妻衛氏家居養

清皁獨廬墓上負土為墳疏食水飲終其喪清卒亦如之

丁文忠許州偃城人業鼓冶母和氏疾與弟文孝竭力調侍母卒文忠廬墓側不與妻面者三年父貴又疾醫不能療文忠造車一輛兄弟共御之載父禱於嵩山五臺泰安河瀆諸祠途遇異僧遺藥而愈延祐二年旌之邵敬祖宛丘人父喪廬墓母繼歿河決不克葬殯於城西敬祖露宿依其側風雨不去友人哀之為縛草舍庇

之前後居廬六年兩髀俱成濕疾至治三年旌其家其  
後又有永平李彥忠父喪廬墓八年不至家茶陵譚景  
星幼失父追念之廬其墓十年亳州郭成年七十一母  
喪食粥廬墓一年朝夕哭臨人哀其老而能孝

扈鐸汴梁蘭陽人蚤孤育於伯父及壯事伯父如所生  
伯父老無子鐸為買妾歲餘產一女其妾性頗不慧熟  
寐壓女死久之伯父卒鐸葬之甚哀遺腹生一男鐸憫  
前失告其母及妻妹護視之已復廬戶外中夜審察不

敢安寢弟能食常自抱哺與同臥起十年不少怠弟有疾鐸夜稽顙星斗哀禱曰天不伐余家鐸父子間可去一人勿喪吾弟使伯父無後也明旦弟愈母卒哀毀踰禮廬於墓側不理家事宗族勸之歸鐸曰今歲凶多盜吾家雖貧安知墓中無可欲乎倘驚吾親之靈雖生何為卒守廬不去

孫秀實大寧人性剛毅喜周人急里人王仲和嘗託秀實貸富人鈔二千錠貧不能償棄其親逃去數年其親



思之疾秀實日饋薪米存問終不樂秀實哀之悉為代償取券還其親復命奴控馬賣金訪仲和使歸父子歡聚聞者莫不嘆美又李懷玉等貸秀實鈔一千五百錠度無以償盡還其券不徵復有賈進大同人大德九年地震民居多傷且乏食進給酒藥炭米濟之每歲冬製木棉裘數百襲衣寒者買地為義阡使無墓者葬之李子敬陝西三原人嫁不能嫁者五十餘人葬不能葬者五十餘喪焚逋券四萬餘貫有司以名聞並旌之

宗祀大都人年十九父內宰卒擗踊號泣絕而復甦水漿不入口者三日哀氣傷心遂成疾伏臥床榻猶哭不止淚盡繼之以血既葬疾轉甚祀有繼母無他兄弟度不能自起作遺書囑其妻楊氏曰汝善守志以事吾母遂卒楊氏遺腹生一男人以為孝感天不絕其嗣云泰定三年旌其門

趙榮扶風人母強氏有疾榮割股肉啖之者三復負母登太白山禱於神得聖水飲之乃痊後年七十五卒榮

號痛不食三日方飲水七日乃食粥葬之日白雲庇其墓前後十五里葬畢而散榮負土成墳廬其側終喪吳好直華州蒲城人父歿事繼母孝兄弟嘗求分財好直勸諭不能止即以己所當得悉推與之出從師學澹泊三十年無少悔又有甄城柴郁陳舜咨皆能孝友以己產分讓兄弟縣令言狀並表美之

余丙建德遂安人幼喪母泣血成疾父亡不忍葬結廬古山下殯其中日閉戶守視有牧童遺火延殯廬丙與

子慈亟撲不止欲投身火中與柩俱焚俄暴雨火滅  
徐鈺鎮江人始冠侍父鎮將之婺源過丹陽小谿鎮乘  
橋失足墮水中同行者立岸上不能救鈺投谿擁鎮出  
鎮挽得行舟以升鈺力憊且水勢湍急遂溺死屍流四  
十五里得於灘江浙行省言狀表異之

尹莘汴梁洧川人至治初遊學於京師忽夢母疾心怪  
之馳歸母已亡居廬疏食哀毀骨力每雞鳴而起手治  
祭饌詣墓所哭奠之風雪不廢父輔臣嘗疾疫莘侍奉

湯藥衣不解帶嘗其糞以驗差劇夜則禱於天曰革母  
亡不能見父病不能治為人子若此何以自立於世願  
死以代父命數日愈鄉里嗟異之又有高唐孫希賢母  
病劇希賢閱方書有曰血溫身熱者死血冷身涼者生  
希賢嘗之其血溫乃號泣祈天求身代之母遂愈高郵  
卜勝榮母病不能藥日嘗痢以求愈兄疾禮北辰乞減  
己年延之並痊

劉廷讓大寧武平人至順初北方兵起民被殺掠廷讓

挈家避山中有幼弟方乳母王氏置於懷兵急廷讓乃  
棄已子一手抱幼弟一手扶母疾驅得免事聞旌之  
劉通亳州譙縣人家貧業農母卜氏好聲樂每眩技者  
以簫鼓至門必令娛侍或自歌舞以悅母心卜氏目失  
明通誓斷酒肉禱之三十年不懈卜氏年八十五忽復  
明至大間鄱陽黃鑑皇慶間諸暨丁祥一皆以親喪明  
以舌舐之復能視並命褒表

張旺舅安豐霍丘人幼失父母陳氏居貧守志旺舅九

歲賣錫以養及長母病伏枕數月旺舅無貲命醫惟日夜痛哭禮天求代未幾遂愈又自以生業微不能多給竟不娶以終母年縣令言於朝旌之

張思孝華州人母喪以孝聞父疾調護甚至不愈以父涕洟半器垂泣盡飲之復潔齋致禱乞以身代未幾遂痊至順三年表其門

杜佑邳州人河南行省署為三义水馬站提領父成病於家佑忽心驚舉體沾汗即棄職歸父病始二日遂禱

神求代且嘗糞以驗疾父卒廬墓盡哀有馴兔之瑞

長壽父帖珠官平章政事生五子長山壽早世次即長  
壽次永壽福壽孟古哈雅元統間帖珠歿長壽哀毀盡  
禮服闋當蔭叙與弟羅拜母前曰吾父廉貧諸弟未有  
所立願以職讓永壽永壽讓福壽福壽曰二兄能讓福  
壽獨不能耶以讓孟古哈雅母從之孟古哈雅遂告蔭  
為太禧宗禋院神御殿侍禮佐郎階奉議大夫兄弟奉  
母尤篤邦閭美之至大間河中梁威遜親喪廬墓兄諾



海為鄂囉官自以嘗遠仕不得養其親即棄職舉威遜  
代之人稱威遜能孝諾海能義又有輝和爾氏齊齊克  
及濠州高中嘉定武進皆以侍親不願仕以祖父蔭讓  
叔父昆弟云

孫瑾鎮江丹徒人父喪哀毀嚴冬跣足而步停柩四載  
衣不解帶常食粥誦佛書及葬載柩渡江潮波方湧俄  
順風翼帆如履平地事繼母唐氏尤孝嘗患癰瑾親吮  
之又喪目瑾舐之復明唐氏卒卜日將葬時春苦雨瑾

夜號天乞霽至旦雲日開朗甫掩壙陰氣復合雨注數  
日不止又有吳希曾睢寧人父卒葬之日大雨希曾跪  
柩前炷艾燃腕火熾雨止既葬廬於墓左縣上狀並旌  
之

張恭河南偃師人以兵部符署鷹房府案牘親老辭歸  
侍養墾理先墓身負水灌松栢父喪過哀侍母馮氏尤  
謹歲凶恭夫婦采野菜為食而營奉甘旨無乏母有疾  
恭手除溷穢喂哺飲食且嘗糞以驗疾勢天厯初西兵

至河南居民悉竄恭守視母病項中一劒不去母驚悸而歿恭居喪盡禮人稱孝焉有詔旌其閭

訾汝道德州齊河人父興卒居喪以孝聞母高氏治家嚴汝道承順甚恭母嘗寢疾晝夜不去側一日母屏人授以金珠若干曰汝素孝室無私蓄我一旦不諱此物非汝有矣可善藏之母令他兄弟知也汝道泣拜曰吾父母起艱難成家業今田宅牛羊已多汝道恨無以報大恩尚敢受此以重不孝之罪乎竟辭之母卒哀毀終

喪不御酒肉性尤友愛二弟將析居汝道悉以美田廬讓之二弟早世撫諸孤如已子鄉人劉顯等貧無以為生汝道割已田畧畀之使食其租終身里中嘗大疫有食瓜得汗而愈者汝道即多市瓜及攜米歷戶饋之或曰癘氣能染人勿入也不聽益周行問所苦然卒無恙有死者復贈以槨殯人咸感之嘗出麥粟貸人至秋蝗食稼人無以償汝道聚其券焚之縣令李讓為請旌其家



元史卷一百九十七

元史卷一百九十七考證

南陽陳介淮安翟諤 續通考作陳仁穆諤

王閏傳中統二年復其役 永樂大典載復役在中統  
三年

甯珠赫傳珠赫李嘉努管如林朱天祥並以母疾剖股  
旌其家 按元典章至元七年御史臺以新城杜添  
兒割股奉母請旌省議以毀傷親體不行珠赫等子  
旌當在七年以前事

尹莘傳 按莘一統志作莘續通鑑作莘